

四庫全書

集部

欽定四庫全書

雞肋集卷二十八目錄

雜著

賓主辯

諱辯

話述

七述

醫言

雞肋集卷二十八目錄

欽定四庫全書

雞肋集卷二十八

宋 晁補之 撰

雜著

賓主辯

晁子既撫陶子歸去來辭以名其居而記之自以聞道歷年而為潛不足中慙而疑隱几去智則方寸之地廓然其虛若兩丈夫為主與賓巾裾而坐廬賓曰子道與吾殊而多謂子類余豈其然乎凡子以躁樂

吾靜隘悅吾和子人之放也而多謂與我自放者同  
科我遺夫世者已盡子緣於物者尚多而子賓賓焉  
以從我奈何主人曰萬物聚閭千古並塗然求諸其  
間天地異職父子殊面莫大且親而相因以判今賓  
方欲合兩人為一體則物我蠱起不可得而止賓不  
通之則自賓之身十指長短兩目大小肝膽共絡而  
楚越畫界也况賓出千載之上我起千載之下別族  
離居所遭異者而賓乃斬然為間方且病我之浮氣

獨不傷賓之大同乎賓自揣心日化年改壯異幼時  
老乖壯日今是昨非前棄後拾使賓自操且不可得  
蓋孔子聖人猶六十化智如惠子徒觀其勤未知其  
謝賓如通之則齊嬰公扈離立易心夢為魚鳥可與  
飛沈况我欲遵子若是其賓賓者耶如賓之詞委心  
去留棄化歸盡化乃所過胡可以吝我之慕賓亦以  
是近躁靜隘和曰情非性人放自放非故曰命極則  
俱極進則皆進賓遺夫世者雖盡而猶多我緣於物

者雖多而必盡則又胡可以賓之既瘳而傲我之方病也水既蛻地氣又蛻水吾方解我之不然而經賓之所以則我既化矣雖六十改未知為數也且物固以其近相慕昔伯宗人言其似楊父則憚桓溫婢以為類劉琨則忻夫楊父劉琨徇權殞身而夸者慕焉恐不得鄰前與既覆後轍不遂彼皆炫智而鬪力角驅而競犇故彊弱斯在而勝負可論也今我與賓既已俱出乎忘我之境而同塞乎累物之門得失安在是非奚存哉賓獨

不聞魯男子之拒託宿者乎。登曰：子胡不若柳下惠？  
子曰：柳下惠固可，吾固不可。吾將以吾之不可學柳下  
惠之可，而孔子以謂學柳下惠者多矣。然未有似於斯  
人，今欲使我如賓解組長遠，我則不可。可在佚身，賓則  
猶我。譬魯男子審已，故其為柳下惠也不以其同，而以  
異及其至焉。一也可，不可安寄，賓亦奚以知我不與賓  
同？至於葛天氏之地，以謂何如？於是賓唯而起，主人送  
之不離席，則霍然若寤，廼書之記後。



諱辯

禮不諱嫌名二名不偏諱孔子之母名徵在言在不言  
徵言徵不言在補之先君子二名禮不偏諱者也單舉  
則於禮無怍矣而世皆偏諱厚於古不敢變也若嫌則  
後世亦有不諱者矣漢和帝名肇不改京兆郡魏武帝  
名操而其子植詩云脩坂造雲日肇非兆造非操也唐  
韓愈非薄於親者作諱辯抵諱嫌者曰父名仁子不得  
為人乎義盡此矣然周人以諱事神亦惡夫音之斥也

甥輩讀有若酉者斯可矣

話述

晁子嘗曰至人鶉居而穀食鶉無常居穀仰物食我窮  
殆似之蚍蜉集其枯螟宛轉于塗而我不廬開口待鋪  
廼不如彼鳬有喙則腴其妻曰水舟而陸車乎憎里巷  
而愛岐陌乎今日越而昔者燕乎雲忽忽乎萍不止乎  
大章廬教步八極乎荒土功乎負羈紲乎孔不暖乎墨  
不黔乎無乃蟬蛻蛇足躁不一乎陽鳥鷽鷽氣則移乎

敗瓦墁乎長鋏慨乎匍匐往三咽乎人蓐食而媪見哀  
乎東郭穢而中庭泣乎貿貿來乎額額然伏乎西山餓  
乎雉噫徙乎無乃侏儒瞽師困慰祿乎豢豕犬羊犧餼  
養乎凡子行人間何以請擇事晁子曰唯既而曰龜笑  
不知我知之乎適可則可我不可乎其妻曰唯舍然大  
笑

七述

時年十  
七歲

予嘗獲侍於蘇公蘇公為予道杭之山川人物雄秀奇

麗夸靡饒臯名不能殫者且稱枚乘曹植七發七啟之  
文以謂引物連類能究情狀退而深思倣其事為七述  
意者述公之言而非作也眉山先生懷道含光陸沈於  
俗日與嵇阮賦詩飲酒談笑自足泊然若將終身焉於  
是潁川孺子聞而往從之躡屐擔簦破衣踵門及階而  
止望帷而稱曰不敏聞先生之誼敢待于下風先生矍  
然驚曰孺子來吾惡夫世人之保我也久矣而不能使  
人之無我保則戶外之屐滿焉將命歟吾無所逃此雖

然孺子何為者也孺子曰幼而多治長而屢窮遭先生  
乎齟齬之塗陪先生乎寂寥之事樂先生之所為樂者  
以白吾首其已乎先生啞然笑曰孺子上吾以樂而未  
嘗無以樂者順也羈旅于吾有時矣亦嘗聞杭之山川  
人物雄秀奇麗夸靡饒阜可樂者乎孺子曰先生不以  
不敏為難與言得聞咳唾之音不敏以為幸先生將何  
以教之

先生曰杭之故封左淞江右具區北大海南天目萬川

之所交會萬山之所重複或瀨或湍或灣或淵或岐或  
孤或袤或連滔滔湯湯渾渾洋洋纍纍礧礧隆隆叩叩  
若金城天府之彊其民既庶而有餘既姣而多娛可導  
可疏可舫可桴可跋可踰可撐可車若九洲三山接乎  
人世之廬連延迤邐環二千里邑居牧聚蟻合蜂起高  
城附之如帶繞指隱以為脊折以為尾因河塹華不足  
方比方城漢水胡敢競美當昔夫差之盛時內姑蘇以  
為心腹而外城此以為身革車千乘甲士萬人粟支十

年帛散千屯洒汗成雨連衽成雲乃有大夫伯詒行人  
伍負之徒通其謀將軍孫武公子夫槩之徒用其衆嘗  
以國政之閒發徒截江命習戰事於是張翠羽之蓋靡  
魚須之旂揚鷺足之楫曳龍尾之舟凌鱣黿之車戲責  
獲之儔飄鼓吹乎下風隘戈矛乎上游乍往乍還乍後  
乍先若亂而若聯乍止乍馳乍合乍離迭唱而迭隨驚  
鮫人立馮夷清江忽兮怒濤颭風為之揚岐急而即次  
食具樂作三軍皆賀響震山壑其彊如此故姑蘇恃以

為南蔽而能驅唐蔡蹂齊魯侵尋乎百粵隴突乎三楚  
栖句踐乎窮山鞭平王乎頽墓此亦天下之形勝也孺  
子欲聞乎孺子曰西河中流衛客之所能諫秦險百二  
亭長之所能入願先生廢此而語它

先生曰吳越之有東南也實國于杭而杭吳越之大都  
也宮室之麗猶有存者其始也削山填谷叩石墾陸麗  
林誅樾擢篠夷竹旋緣阿邱憑附隈隩千夫運畚萬役  
供築增增硜硜坎坎碌碌前呼後和遠近相屬卑者起



之以有餘高者損之以不足開曠朗乎蒙密發現奇於  
潛伏然後工人之材陶人之瓦水輸陸運屬於連輅縱  
橫錯落山積其下其成也翼翼鱗鱗勃鬱輪囷若化若  
神上據百尺之巔下俯億尋之津雙闕高張負臨康莊  
門開房達乍陰乍陽中則複殿重樓砂版金鈎卑高仰  
俯下上明幽崢嶸截薛鼎峙林列吐吞雲霧虧見日月  
宏規偉度古曠今絕旁則曲臺深閨碧檻朱扉鱗差闕  
限奕布棖題拱盤白鳳壁戲青猊溫風徐而吹座寒雨

沐以霑帷列屋而侍者則妖嬈豔姝螭首冰膚清臚  
素齒既爛而都乃服輕袿被華裳綴珠履揄鳴璫飾鉉  
英含若芳倩巧笑兮婉清揚縹緲兮如雛鸞之欲舞逍  
遙乎如飛雲之欲舉婫姍媚嬈婉嬈媚嫵流榮發色不  
可程度羽觴薦朱顏酡悲激楚妙陽阿詞曰陌上花開  
游女歸園南池北黃鸝飛曲房清閣夜更衣於是聞者  
恍然神揚意馳紛紛擾擾惑亂不怡此亦天下之雄觀  
殊樂也孺子欲聞乎孺子曰宮居閨處者寒燠之媒而

疾癘之梯也。且館娃成而麋鹿游，願先生廢此而語它。先生曰：杭故王都，俗上工巧家，夸人閭窮麗，殫好紛拏。錯糾晃蕩，精晶若八方之民車；漆舟會角，富而衍寶木。則花梨、美楸、梔、柏、香、檀、陽、平、陰、祕、外、澤、中、堅、以、斬、以、刊、以、剖、以、剡、以、漆、以、膠、以、墨、以、丹、為、床、為、櫛、為、几、為、槃、為、巨、為、盂、為、簋、嚴、莊、之、佛、慘、烈、之、神、詆、怪、之、鬼、頽、姣、之、人、塗、以、鈇、英、鏤、以、金、文、依、以、靈、山、棄、以、飛、雲、霞、煙、霧、靄、煥、爛、五、采、渠、輸、陸、運、投、錢、競、買、曾、不、若、母、猴、木、鳶、三

月而齊一日而敗衣則紉綾綺緋羅繡縠絺輕明柔纖  
如玉如肌竹窗軋軋寒絲手撥春風一夜百花盡發其  
製而服也或袍或襖或紳或綸繅或緣或表或縫或欄  
或紫或纁或紺或殷嚴以奉祠褻以養安薄以却暑厚  
以禦寒以錫三軍以賚四國以供耳目之玩以備土木  
之飾曾不若窮邊絕漠不紡不絡衣狐而袖貉寶則璆  
琳珊瑚碼碯砮砮藥化之玉火化之珠琉璃之椀水精  
之盃紅黃白綠磊落滿櫝北商東賈百金不鬻沙河雨

晴月照燈明席張案設左右煌熒遠而望之奪人目精  
遺英弃屑籬貯箱列曾不若宋人之拙三年而一葉於  
是彫床易席地之野文衣後弋綈之儉玉杯鄙土釧之  
啜此亦天下之妙工絕巧也孺子欲聞乎孺子曰書云  
玩物喪志紂為象箸而箕子歎願先生廢此而語它

先生曰杭之為州負海帶山蓋東南美味之所聚焉水  
羞陸品不待賈而足肉則封獮貙豕置兔畋麋山狸白  
額竹犬青尾鷓鴣鵝鶩鶩禿鴻鴈園鷄池鴨隴雉田鷄

陵收水截頭駢尾列磔肩裂趾飛毛灑血魚則鮓魴鱸  
鰠鱸鰕鰢鯉黃頰黑脊丹腮白齒江鱖之醢石首之羹  
或腊而枯或膾而生白鰻青鳊黃鰻黑鱖鰕魚花蛤車  
蛾淡菜蛙白肖雞螺辛類芥鼎調甌餽牛脰貉噉果則  
枇杷楊桃橘櫟粗梨青梅黃柿紫栗烏桺溪菱江蘆田  
茨湖藕壤肥水美天下無有冒以黃蜜漬以白醪芳香  
脆潔析醒解痾菜則茼蒿茵陳紫葳青萼韭畦芋區茭  
首芹根藤花羞盤菊葉薦苔薑辛薤淡薺甘筍苦飴以

姑蘇之粳薦以烏程之醴于以和五氣于以資百體此亦天下食飲之珍也孺子欲聞乎孺子曰揚雄有云弃常珍而嗜異饌烏覩其識味也且養身而尚乎味味則愚以聖人為不如易牙願先生廢此而語它

先生曰地不滿東南故八紘之水歸焉水之為物潤下作鹹溟渤蕩波海門莫緘駸駸脉布溢于江潭老澤席賡囊山煮海豫章為船萬斛更載一船所受車數十量黃頭多錢富不可做士之頑鈍不恥者皆餌其無厭之

賞譬如山深而獸至木茂而鳥往故能收亡命借廝養  
連應高之交合周邱之黨以北與中國爭長則鹽之利  
也夫鹽者食肴之將五均賒貸幹在縣官僅法議籠不  
罅以完大農給費入助國計官與牢盆世擅其利民有  
盜鬻則鈇徒計反左趾沒入其器此為前古之所制嘗試  
觀乎江之濱葭葦不根淺草芸芸斥鹵無垠白花蘚文  
百里如雲鹽官千家匪拓匪麻匪漆匪茶規利乎泥沙  
蟻封蚓垤積土如截削剝剗不漏毛髮挾攜擔揭十



步一蹶偷趨竊走遺筐弃缶塗闕塞牖鼎釜雷吼皓然  
紛葩豐不盈斗姑以漬螺蛤而適口曾不比夫縣官治  
鐵如山析竹為盤熾火以燔淵壑為乾崢嶸峭崿戕削  
律瓦扶舒蕭勃煙氣滃出若滅若亡若失乍疑鹽陽之  
神翳乎與羣蟲朝飛而蔽天日立呼起諾百夫齊作紛  
紜揮霍千竈就涸光芒閃爍璀璨磊落小星迸躍鱗鱗  
新倉歛貯堆蔽如帛如糧國以是彊神變鬼化刀貝齊  
價獨不美夫算菱芰魚蠟之殫細及下者哉諺曰千金

之子不死於市又曰人富而仁義附焉此先生所以教  
民知榮辱之時也孺子欲聞乎孺子曰猗氏之治智賢  
白圭而不監於道願先生廢此而語它

先生曰江源所起濫觴之墟泓泓汪汪不漏不虛放而  
行之冒於川渠繚繞縈行左挾越右截吳以散以敷然  
後淫為大江以東合乎尾閭而潮生焉古今所論潮者  
日月伏見之所為也嘗讀沌天之說曰地浮水中天在  
水外水之消息垓北無際一闔一闢若開天地一呼一

吸若出元氣其始來也若毛若線若帶若練堂堂沓沓  
合聚離散須臾之間千化萬變其少進也敲磕鏗砢石  
號木鳴越岸包陵在谷滿谷在坑滿坑其為氣也或煦  
或呀或噫或噦瀾茫漉漫澎沸渭潏洞澠漾潏潏滂  
沛涵澹淋滲漶濺淫泄跳珠湧沫百里紛會沃焦蕩胃  
汨母陵背縱橫絡繹飄忽爭逝徐則按行緩則就隊連  
氛累裊陽景朝昧周天而旋踰八萬里不知其所憩於  
時元冥收威海若振吼千溪萃立萬浦却走絕維推軸

神母不守左驅天吳右拂九首淵客拒扉水夷潛牖江  
神海締絕脰傷肘陽侯馬銜顛蹶前後其為象也則紛  
紜參差萬頃一迹禹不能知契不能識承光露怪不復  
潛匿或駛而蹄或森而戟或美而殪或張而翼洶湧而  
奔以沃海門若土囊風怒驅屯雲辟易而征以擊西陵  
如井陘戰酣出奇兵宛兮改容若蓐收素服駕白龍忽  
兮當前如歸墟泛溢浮五山一北一追一僨一起突然  
而逝餘勇未已於時吳兒獠工引檣掛席鐃鳴鼓動去

若飛鷁風止雨息江清海碧此潮之大凡也傳曰上善若水又曰水幾於道故古之人見大水必觀善利萬物似仁不畏彊似勇能方能圓似智萬折必東似信若是者孺子欲聞乎孺子曰幾矣先生之所陳五事之上也姑欲聞其深於此者

先生曰西湖之深北山之幽可舫可舟可巢可樓與鷗鳥居與鹿豕游漁蓑山屐煙雨悠悠寂寥長往可以忘憂風衫塵袂京洛何求不如西湖瀕不如北山阿白蘋

綠芰紫栢青蘿反裘坐釣散髮行歌人生安樂孰知其  
它茫洋以為柳溪盤旋以為李谷卷軻辯乎三尺之喙  
擴夷隘乎十圍之腹此古君子所以藏器于身待時而  
動也傳曰不怨天不尤人蓋優哉游哉聊以卒歲若是  
何如孺子竦然離席而立曰蓋聞達人不忘身而先利  
志士不貪時而後義隱之所尚得全於天也孺子不敏  
乃今得聞出處之際敬再拜受教

醫言

上醫醫國或曰不然醫曰譬國於身天地乃所寓之形  
元氣乃所恃而生堅骨脆肉山石壤墳也中列五藏五  
材是營也風雲其衛百川其榮也闔闢運轉有神欲行  
也故昔之論養生者曰抱形以靜神將自正无揺汝精  
乃可以長生盖天地亦物也其不壞亦然得一以清寧  
其析於一成虹而洩歲祁寒暑雨災害乃生時則有陵  
鬪隕墜扎癘蟲螟歷象授時使氣行正不有聖人孰醫  
國疾以國觀身理自此知不有聖人人誰則醫譬醫有

經黃帝二典岐伯猶謨浮沈生死帝俞伯都平章於變  
亦與氣俱盧鵲秦和王佐可蹈鵲猶伊訓和比虺誥漢  
淳于意如說作命說不自言于古其鏡華佗反經既不  
得已散干礪刃如甘戰誓何異吾醫亦論其世堯湯水  
旱國豈無疾稽天焦土要不病粒五毒所攻瘞發中古  
武砭已甚血流漂杵七雄裂之五藏用爭衡秦縱楚焦  
腑炭冰衛生匪經民中道夫至秦暴蹶氣并則槁求諸  
身中一藏彊勝四氣為微一安得競匪淳益漓醫斯用



奇黃典岐謨安所救之鵲觀五會和參天命至佗而極  
刮脾濯腎聖有至言代斲傷手世復無佗矧敢佗又佗  
雖傷手猶漂杵然時周之命反商之顛過是益狂術亡  
不傳大疾始間漢與休息小廖未復唐用飲食何世無  
醫孰曰不知不培其生毒熨妄施曰我術聖望而知之  
緒餘帝伯卑鵲和意曰如漢唐又何足議何異魯連好  
高自竒徒稱唐虞顧未知之鵲和得咍他何足議矧無  
佗術廼行佗事季良三醫一論其天不為何敗其平自

然曷不卑之無甚高論秦病可言釋之為近國有常治  
治不以智若烹小鮮時治之理生有常經亦不可擾損  
石益穀時醫近効滋彰法令盜賊乃多疾焉勿擾氣復  
則和何以休之惟勿益生築垣為室蚤作晦息平康有  
道醫於何力民有聖言有病不治起居惟常常得中醫  
作醫言



欽定四庫全書

集部

雞肋集卷二十九至三十一

詳校官庶吉士<sub>臣</sub>初喬齡

侍讀<sub>臣</sub>孫球覆勘

覆校官主事<sub>臣</sub>李駿

校對官中書<sub>臣</sub>王鍾泰

謄錄監生<sub>臣</sub>畢所諱

謄錄監生<sub>臣</sub>張士琛

欽定四庫全書

雞肋集卷二十九目錄

記

博州高唐縣學記

冠氏縣新修學記

清平縣新修孔子廟記

沈邱縣學記

祁州新修學記

林慮縣學記

慶州新修帥府記

照碧堂記

雞肋集卷二十九目錄

欽定四庫全書

雞肋集卷二十九

宋 晁補之 撰

記

博州高唐縣學記

始余讀史記至西門大夫治鄴投巫嫗三老禁為河  
伯取婦喟然嘆曰賢哉西門大夫稍行四方見今為  
縣令者論罪人適榜箠耳亦具獄乃決佐史自旁持  
之至上下顧莫敢誰何於是益太息知豹為不可能

其後讀律令見所以繩吏者甚具更悟曰法如是耳  
晚得高唐令王君聖塗而異之聖塗為高唐非能外  
律令用其意也而獨規矩捨攘之中從容以和夫使  
騏驥得原野則勢便利至里門曲躋六轡不亂而所  
投無差難矣哉高唐民貧聖塗惟不奪其時民以富  
縣有孔子廟歲久壞弗治學者莫至風雨草生之可  
羅雀也聖塗曰我豈得勿憂猥自安曰非不能或不  
可姑以俟後人而已哉舉而新之鳩材庀工人罔告

勞也又教其邑中君子小人以學道之美武城絃歌  
達于四境余聞而喜曰非有為則難以莫之敢為而  
為之則難古者其美是人也嗟嘆之咏歌之亦使繼  
者歌吾子可也故為詩以遺其邑人俾不忘王君曰  
高唐之學兮王君之作兮王君去我誰吾與覺兮誰  
使此微兮而舉則希兮王君去我誰吾與歸兮元豐  
四年七月丙戌學成十一月戊子潁川晁補之記

冠氏縣新修學記



太師潞國公留守北都余故人鄭君為其戶曹掾數持檄出潞公曰鄭參軍才無俾去府中即奏以為其法曹掾公還雒鄭君亦去為冠氏令冠氏父兄聞鄭君來咸賀曰是公所奏以為其法曹掾者也相與戒其子弟無犯鄭君法故時冠氏人務衣食知學者鮮朝廷方以丁聯兵鄭君從容不擾人人安鄭君爭趨令無幾何則習擊刺馳射足任矣鄭君出野民有歌者曰犀邪兕邪襜褕者憊邪鄭君曰嘻有勇而無義

安可乃為之布約束無不信驚者執之它日出野民  
又有歌者曰無以吾乎曠襍禡者方作無迺吾鄭君  
不樂鄭君曰民庶幾可教也歸洒埽召其僚與賦詩  
飲酒言治民之意見諸生問所以學而別其秀民民  
益勸乃即孔子廟為學學成又率諸生日談經其間  
諸生自它邑者常屬絃歌釋菜洋洋也於是民以為  
榮爭遣其子弟往觀頗改服為士矣間以書抵余願  
有述余曰士學古入官有人民社稷豈其一切效俗

吏如不及者乃鄭君所謂不忘其本者非耶因采其  
行事本末可為邑人道者刻石學中俾無忘鄭君鄭  
君名僅字彥能彭門人嘗從彭門守眉山蘇公游蘇  
公稱其良士始知名元豐七年八月甲午濟北晁補  
之記

清平縣新修孔子廟記

羣有司所治異事而事之在縣者十九以其十一用心  
乎治之本則力不給故雖有庠序教化亦十九不舉一

有舉焉令之才足以任事可知已魏為天子北都而清  
平為畿縣並河水數至自慶歷逮治平縣再徙不復立  
孔子祠為屋居神民往來猶原上也令始至吏導之拜  
屋下歲春秋釋奠為次草間吏曰即次乃即次曰行事  
乃行事曰禮畢乃禮畢俛默而出不復省或告曰此宜  
省則頰蹙曰吾有公事不暇也若是者有年至風雨屋  
壞不支縣之民為士者滋少令錢侯之來惻然悲出涕  
裴回彷徨顧相其地得舊材瓦甃在官者幾具始復興

之人歡然從不勸而成有堂有筵兩廡四墉饍饗有所  
若祭器咸在而人不病斯已才矣夫儒術之於成民欲  
久於其道則為功緩故急於人知者忽之錢侯不以人  
之所急者為先而急於人之所緩則其賢又可知已由  
是詢諸邑人其大者既舉其細者有不治余不信也錢  
侯名唐卿字元輔余王姑之子云元豐六年二月乙丑  
北京國子監教授晁補之記

沈邱縣學記

民可以誠化而不可以文治吏功可以歲月致而不可以一朝成古者繼世以立諸侯又命之教而為學使各以其身化於其國然中材之君意竭於有為而先王之事業曠時而不一覩况夫後世吏不得久於其官而庠序之教已微吏有愛民不苟之心不幸或不得為而去或雖為之名具而實亡以其鹵莽滅裂僅存之餘而施之其久壞不安之俗故為其事而無其功豪傑遠識之士以謂是區區何益於為民而不為中材乍存乍亡而

不肖者盡棄不省而好更張喜事者乃始務修此以盜名於衆人不為之中則學之存否於吏治之損益信未  
有繫也蓋如卓茂魯恭其治至使民相仁愛不犯有司  
而亦不聞其朝夕與民誦詩讀書舞樂釋菜常常從事  
於此而惟其誠心實事則固有以得之然俗吏至或一  
切務簿書獄訟財賦無愛民之意士亦不本鄉黨庠序  
而游談四方專以干祿於此以為文不足為或不得久  
而不為則至於俗墮弛已甚本又不立孰從而維之譙

郡張柔文剛好學而有文為令沈邱嘗曰位無貴賤皆  
可以行志民無古今皆可以道理齊也則欲以其學試  
之沈邱使民於衣食必以時教民於相收養必以孝弟  
廉恥三年而民有改文剛喜曰吾所知信是吾民可與  
言矣乃從其邑子論古之學者所以治心修身非干祿  
之意而士亦欣然相與化之乃建學孔子廟中貌像堂  
室東西序之房與祭器廩庖皆有所蓋為屋四十楹可  
以待鄉先生之講道而來子弟之願游者屬補之記補



之曰世之所患先王之事業不可為非先王之事業不可為而其勢不得為治天下有本而徒於其末救之則智不勝無以為之大而僅為之小則力不足雖然導民之道唯其所欲無不可成民嘗見者則識之嘗為者則能之耳目習熟於此而中心不喻人情無有也文剛則於是能知其本則其所施設宜有先後非特以備觀美人為亦為而已武城絃歌夫子戲之曰割雞焉用牛刀然亦各以教其人使知道則子游之意卒乎為是以為

不告朔而餼羊可遂去則夫子之所悼也民常病詐而  
至其化上之所為則甚信晉之儉秦之好車馬鄭衛之  
音宛邱之婆婆以詩書所記行四方察其風俗無不近  
者當其一時上之所為豈自知能入人如此之深耶其  
漸靡使然朝鮮去箕子千載至漢時其民飲食猶以籩  
豆民不相犯恥淫僻其後吏及賈人往者稍侵之俗乃  
益衰朝鮮夷貊況中國哉後之來者嘗無忘文剛所欲  
為則沈邱之民雖使世世知好學俗純厚易治無不可

也元祐二年五月十日晁補之記

祁州新修學記

先王以禮為天下禮行而民有恥以樂為天下樂行而民鄉方以庠序養天下之才而君子之學洋溢於四海先王之須數者以治如此而自後世視之則常若迂遠而不切於治之情夫古與今一也而先王之用禮樂則如帛縷之於衣穀米之於食每須而常効而後世之用之則如觀殊類之好而名異國之物雖存而猶亡射鄉

食享禘襲之文而遵豆之器鍾磬祝敔綴兆之容而搏拊之節是先王之所朝夕用以為禮樂者也而行之於後世則文齟齬而情不安若度十指而合方圓非聖人復生不可得而定是先王之禮樂終不可用於後世也然而後世亦何嘗一日而無禮樂賢君良吏誠心於為治各因其世所用者而用之以合恭敬而交歡欣亦不見其少雖聲音服器滅裂於已壞之餘而參差於不同之緒至雜野人里巷之說而用之蓋禮樂自此而亡然

亦或自此而存何則其文異其實在也至於庠序先王之所以教人事父兄親宗族而善鄉黨內之於治心行已外之於事君牧民蓋亦如此而止矣而世之為士者聞先王之教則漠然若非其身之所當任而惟其文詞記誦所以干有司者為師儲粟闢屋而誅之三歲而一取士集於堂者如市否則掉臂而不顧蓋僅有存者夫如是則州里之有學特以為求仕者之舍耳而於治誠何補哉然盡棄而不舉專以文法賦歛目前之所急者

為務則民益野一州而有學則一州之為士者多一邑而有學則一邑之為士者多使夫世之所謂賢有知者不出於士則已賢有知者而必出於士則為士者多蓋先王之教所以在也河北自五代兵革遷徙之餘而士日少至本朝百有餘年朔方之民得安於衣食而偉人巨公間出於其地仕於四方以文學政事顯者往往而有祁州又支郡而求舉於有司者率常百餘人舊有學不復葺學者至散而入他郡宮苑使董侯之為守始至

慨然以為先務而郡貧力不足以為乃歛菜圃之課當入於守者日二千錢舉而新之籍其圃之入以其半為學者之食其居處安其資糧足而無患矣復得前進士彭城趙君懷之以教授學者學者日至絃歌之聲遠聞使其子迺以書抵補之求為記補之以謂自三代之亡由秦漢至於今所以教養人材者固無復先王之舊凡幾百千年矣而忠臣孝子仁義之人操守廉潔之士器足以任重而致遠明足以解疑而釋惑彊足以勝難而

處劇朝廷用之則重捨之則輕天下有之則治無之則  
亂者亦凡幾何人而豈其必出於先王之庠序亦各因  
其世所有取之長才秀民傑然於衆人之中若物之精  
華不可得而揜終不以教養非是晻曖而不出亦何必  
曰春夏教禮樂秋冬教詩書十有三年而舞勺成童而  
舞象中年考校九年大成論辨而升黜之一切皆如先  
王時而後得哉有誠心若古之人則處今之事而要古  
之効何適而不可龔遂黃霸漢之良二千石此兩人何



必文武成康之吏其教民成俗亦何必文武成康之法而正使文武成康之用吏亦不過如此歸於治而已雖然此可為通人道難為守文不知變者言也董侯以文法中第而不用顧以其才雄於諸將武人之間而其政事施設先後如此惜也其試之小不獲試之大也故序其意而刻之

林慮縣學記

先王之治其實不可為也而文可為夫文亦安足為哉

蓋文者實之所寓而存也并文而去之實之所存與有  
幾然則存其文是存其實也遵古人之跡而為之加以  
誠心不倦而能久則實斯可幾也已食飲以遵豆俗而  
有先王舊也則朝鮮可求禮被髮而祭於野中國而用  
其事也則伊川為戎此非夫文存則實存文先喪則實  
并亡者乎故魯不棄周禮則君子以謂未可動子貢欲  
去餼羊則聖人以謂我愛其禮此深知為治之意者其  
於守先王之故本末惟謹雖其既絕之緒不可復之餘

而僅僅焉不欲其廢而不舉者如此也無棣劉君演好學良士其為林慮令也下車而問庠序之政若令之事莫先於此者而先聖之祠有堂而無序風雨屋壞雀鼠之所舍不足以備登降供禮事劉君愀然不樂以語其僚曰此於事若緩而急者吾聞之君子米鹽獄訟吏之力可以朝夕為者至焉則為之一日去則已矣若夫事之大而緩者則其舉百一盖未嘗為而去者相輩也我不敢以後吾之所急顧一錢一工之在官者令不得專

馬使吾常知所急而不敢後日儲之不足歲儲之有餘  
則學之成其必有時矣蓋自始至至將去踰二年而學  
成為屋五十有五楹貌像一新講有堂休有房廩廩饒  
囊有所賓客諸生之至者曰美哉昉於此前此無有也  
於是乃介其主簿真定耿君轍求文於補之以記之耿  
君儒者道劉君所以治其邑事皆若此一二修舉類不  
苟然者士相與歌其能民聞其欲去而戚者甚衆也人  
之言曰以儒術緣飾吏事儒術之不可一日無也如此

昔者子產為鄭陳伐之子產能以其衆入陳蓋數俘而出致地而還以獻捷於晉而晉人猶難焉子產陳周之德數陳之罪甚順而有禮晉人乃受之仲尼曰晉為伯鄭入陳非文辭不為功夫子產之功不在其對晉時而晉之受之又不在其功可尚卒之其事所以顯而不泯者獨其文辭足以發之若俗吏一切用其力於簿書法令之間而不知緣飾有禮義何足道哉然則劉君以謂於事若緩而急者不可忽也

慶州新修帥府記

上即位之元年憂勞遠人欲與之休息詔邊臣按兵自守毋生事疆場有不如詔旨務利者罷斥之先是文正范公與今右丞相父子帥慶皆有恩德在慶人上方招延老成而丞相以給事中召自慶且大用矣朝廷既難其代而謀慶人之所安者於是朝散郎直龍圖閣范公自京東轉運使擢環慶路經略使知慶州詔曰爾尚無忘爾父兄之功公拜稽首就道且公嘗使陝西攝帥事

慶人父老聞公來咸賀未至而其心已安之雖其宿將悍士以公家世聲名惠澤與其所施設素信於心皆拱手待令愛行而威不試於時朝廷方寬征役民復田畝歲屢登敵芻牧相望公戒邊吏姑謹備得謀者勞遣之使語其酋曰爾無犯我我不侵爾毫髮敵不敢動民既不見公有所為而寇入稀愈益安公政成而無事矣先是慶州官府庫陋朝廷間遣使勞邊冠蓋旁午及歲時燕犒蕃酋將佐皆在坐於堂者肩相摩立於庭者足相

重庖廚吏舍馬羊之所養檐屬垣比殆不足稱連帥之  
居自文正公固欲闢大之至丞相增葺殆半而未備獨  
韓康公嘗建鼓門為閤壯餘或傾側朽腐矣公曰居室  
苟美謂施諸家也至官府所以臨人聽治布禮而出威  
者雖一邑必飭況連帥治哉廼度荒閒地徙饕餮欄廐  
而遠之踰月而公堂成明年春儀門成夏視事之堂成  
周廊廣除博大而沈深蕃首將佐若兵民之來執事聽  
命者知連帥之尊禮行而威申不待聞其號令見其指



麾而其精神氣象已足以折衝而禦侮矣又明年春廼以其餘力築東北隅作堂以燕休而屬補之記其營造之意名堂而榜之補之嘗論公之父子兄弟其謨謀才業固足以相望於前後矣而其一時措置務以便事豈能必同而慶人皆安之何哉竊以謂文正公當康定初元昊叛擾邊中國應敵無寧歲既城大順胡廬而役使其大族明珠滅臧等儲畜益充士可用故文正公欲遂弱賊更有遠略之意丞相當熙寧元豐中洮岷用師諸

邊屢深入斥地矣重虛內事外則力不堪故丞相務鎮  
靜意不在遠略上既專以德懷四夷為長久慮如前詔  
書約束顧邊備不可徹得帥如龍圖公平居第勸課撫  
循舉其廢事和輯其內外吏民若在守不在戰然敵至  
亦不敢侮樽俎談笑賓醉而樂徹人或不見其有所遣  
已而成功如此然後可以待機會制倉卒是公父子兄  
弟所以措置雖各因時有緩急不能無異而慶人享其  
利則同其皆安之豈不以此哉昔蘇綽嘗有所施設以

便一時曰此猶張弓也後之君子誰能弛之至子威因  
罷綽所為而後世善其能成父之志若趙括非不能讀  
書而至於臨事不知合變則奢雖不能難亦終不能善  
也至於居處土木之美陋雖非事之所損益而勢有所  
不得儉前人豈皆以為可忽而不為顧不暇耳由是以  
觀公之規模固甚遠當其閒暇充足獨彊本治內至於  
府庫倉廩無不飭以威屬城而視遠人盖有深意豈易  
量哉匹夫而自為謀養其力以有為一家而自為計愛

其財以有用如李牧之為趙守優游閒暇市租以入幕  
府為士卒費日椎牛醢酒欲戰不許敵至則入收保固  
為勇不為怯也昔江漢之詩言宣王以文武之命召公  
者命其孫虎而虎能似之其詩曰王命召虎來旬來宣  
文武受命召公維翰虎拜稽首對揚王休作召公考天  
子萬壽古之人君能用其功臣之世以有為而其臣能  
不愧其先人之功報上之意者如此故江漢之詩美焉  
嘗試以江漢名堂敘公為政本末而刻之元祐三年九

月二十三日宣德郎祕書省正字鉅野晁補之記

照碧堂記

去都而東順流千里皆桑麻平野無山林登覽之勝然  
放舟通津門不再宿至於宋其城郭闌閑人民之庶百  
貨旁午以視他州則浩穰亦都也而道都來者則固已  
曠然見其為寬閒之土而樂之豈特人情倦覲於其所  
已饜而欣得於其所未足將朝夕從事於塵埃車馬之  
間日昃而食夜分而息若有驅之急不得縱而與之偕

者故雖平時意有所樂而不暇思及其脫然去之也亦  
不必山林遠絕之地要小休而暫適則人意物境本暇  
而不遽盖向之所樂而不暇思者不與之期一朝而自  
復其理固然此照碧堂之所以為勝也宋為本朝始基  
之地自景德三年詔即府為南都而雙門直別宮故經  
衢之左為留守廨面城背市前無所達而後與民居接  
城南有湖五里前此作堂城上以臨之歲久且圯而今  
龍圖閣學士南豐曾公之以待制留守也始新而大之

蓋成於元祐六年九月癸卯橫七楹深五丈高可建旄  
自東諸侯之宅無若此尤者先是南都歲賜官僚賓客  
費為錢七千緡公奉已約亦不以是侈廚傳故能有餘  
積以營斯堂屹然如跳出堞上而民不知可以放懷高  
蹈寓目而皆適其南汴渠起魏迄楚長堤迤靡颿牆隱  
見隋帝之所以流連忘返也其西商邱祠陶唐氏以為  
大正曰關伯者之所以有功而食其墟也其東雙廟唐  
張巡許遠捍城以死而南霽雲之所以馳乞救於賀蘭

之塗也而獨梁故苑複道屬之平臺三十里者名在而  
跡莫尋雖隋之彊亦其所穿渠在耳豈汰靡者易熄而  
勲名忠義則愈遠而彌存不可誣哉初補之以按理佐  
淮南從公宴湖上後謫官於宋登堂必慨然懷公拊檻  
極目天垓野盡意若遐鶩太空者花明草薰百物媚斌  
湖光瀾漫飛射堂棟長夏畏日坐見風雨自堤而來水  
波紛紜柳搖而荷靡鷗鳥盡儻客顧而嬉脩然不能去  
盖不獨道都來者以為勝雖饜於吳楚登覽之樂者度



淮而北則不復有至此亦躊躇相羊而喜矣夫人之感  
於物者同而所以感者異斯須之頃為之易意樂未已  
也哀又從之故景公美齊而隨以雪涕傳亦曰登高遠  
望使人心悴然昔之豪傑憤懣憂世之士或出於此若  
羊祜太息峴山之巔祜固可人其志有在未可但言哀  
樂之復也公與補之俱起廢而公為太史氏補之亦備  
史官間相與語斯堂屬補之記之已而公再守南都補  
之守河中書來及焉補之嘗論昔人所館有一日必葺

去之如始至者有不埽一室者夫一日必葺以為不苟  
於其細則將推之矣不埽一室以為有志於其大則不  
可必卒之其成功有命則姑與蕃之賢於此乎未辯廼  
公之意則曰吾何有於是從吾所好而已矣二累之上  
也公名肇字子開文學德行事君行已為後來矜式其  
出處在古人中其欲有為在天下後世其卷而施之一  
邦不以自少而以自得又樂與人同者如此堂不足道  
也建中靖國元年十二月戊戌記

雞肋集卷二十九

欽定四庫全書

雞肋集卷三十目錄

記

拱翠堂記

有竹堂記

清美堂記

白蓮社圖記

澶州學生登科記

金鄉張氏重修園亭記

近智齋記

雞肋集卷三十目錄

欽定四庫全書

雞肋集卷三十

宋 晁補之 撰

記

拱翠堂記

蕭之南稍東五里曰泉山泉山之勢南峙而北屏左則如濤如雲如虎如蛇騰涌挈蹙雜襲而相羊右則如車如蓋如人如馬逶迤雍容離立而孤驤中則平原綠野桑柘禾黍井閭溝洫什伍而縱橫泉出于山

夏冽而甘冬木落山瘦泉渟而不冰泉旁土腴潤宜  
九穀百果衆物皆夥其南踰百里至于汴舳艫萬艘  
以輸賦于京師以下入于江淮淝荆湖閩廣其北不  
五十里至于泗商賈游士之載者自大野以東西通  
于齊魯趙魏之衝以下達于淮入海而泉山介其間  
其境勝而土樂又甚易至也然往來者旁午而莫之  
聞雖余少長數舍間亦莫之聞也豈人皆不知山水  
登臨之可樂而事驅之惟其憧憧而過者皆有求於

汴泗而無求於泉山故泉山雖近而莫之聞尚有美  
於此者或去城郭益遠居人勝士足跡之所不至而  
田夫野老常居之林以為樵蘇為逋亡聚而泉以為  
漚以飲牛馬千百歲而無過焉者也且物固無情於  
所遭而遺天地之美為可惜又東北俗推魯雖信美  
或不知擇而居居之或不愛愛而不以語人語人而  
不能夸以大之故皆不顯蓋如嶧山靈岩或有名秦  
已來或名天下四絕處與齊境諸泉皆清泠鳴射如



線如珠仰出奇異以皆在東北下國僻處故聞者往往不道道之亦未必信況未有名于昔者則雖近而莫之聞亦無足怪也而竇君師道世居於蕭恬澹寡嗜好嘗為一尉即拂衣去讀書賦詩不以取名而以自娛故能獨得泉山而居之居之而愛然不以語人不夸以大之曰此樂神所祕吾非不能與人同之從我者寡也然士之慕君者時往焉故泉山因以知名而師道没十年其子明遠始益築圃疏沼為亭為庵而面勢作堂臨泉

之上盡山之勝以其四達而望皆山也則以拱翠名之  
曰雖然不能盡也頃余固以聞師道於徐之君子後謫  
佐宋都始識明遠於國子生中出師道詩讀而愛之而  
明遠因道拱翠勝絕且圖其圃以來求文為記而余未  
至泉山也然少游吳愛富春四合皆山民居蟻附山上  
而中大溪蜿蜒貫之嘗自言仕宦幸至縣令當求富春  
然吏居不可久也又竟不得況田畊稼終身優游之  
樂哉又嘗聞膠西牢山有老人七八輩不出山食其山

中藥皆百餘歲耳聰目明意甚慕之而念不可以遠墳  
墓欲築室故緡城東以老而緡去山遠相其原阜見似  
山者而喜則泉山之往來余懷可知矣而明遠方年少  
氣銳日夕治其業為揚名顯親事則雖其居之勝草木  
日茂池檻日修而有時去之得不為猿鶴林澗之辱且拒  
哉昔漢隱者王儒仲與令狐子伯交後子伯為楚相而  
其子為郡功曹子伯因遣子奉書儒仲車服甚寵而儒  
仲子方耕見客不能仰視儒仲愧焉其妻曰始君志何

如今子伯之貴孰與君高而慚兒女子乎儒仲屈起而笑曰有是哉遂共終身隱遯余以謂師道潛德不愧儒仲而明遠溫恭慕義非儒仲子比且功名可求也其成有命則明遠固不得以彼而易此也

### 有竹堂記

濟南李文叔為太學正得屋於經衢之西輸直於官而居之治其南軒地植竹砌傍而名其堂曰有竹塋諸棟間又為之記於壁率午歸自太學則坐堂中埽地置筆

研呻吟策牘為文章日數十篇不休如繭抽緒如山雲  
蒸如泉出地流如春至草木發須臾盈卷軸門窗几案  
婢僕犬馬目前之物有一可指無不論說形容彊譎而  
故評之以致其欣悅而於竹尤數數也顧其地狹而卑  
天雨榛蕪蜘蛛之織河柳兔葵之所交橫而蒙翳人不  
知其竹也有過者文叔必顧堂下而語之讀壁間記仰  
棟而指其牓曰吾固詔客矣客輒然而笑曰今夫渭川  
之千畝淇園之林與南山之造天而蔽日者其大若杯

若孟若桐梓之軀其膠繚岍岩之上而臨百仞之淵不  
特出屋檐而摩牆堵也暮春者春雷隱山萬竒奮角如  
犀兕作籜解而出碧一日百尺彌望不可以極於時刀  
斧之取材者度經圍而得之大小齊一西轉巴竿南引  
江漢浮渭而亂河困束籜屬而下者為筒為干為屋椽  
捷菑千丈之竿徧國之藩籬是賴與竅而比夫律呂以  
悲哀娛耳者昔聲滿天地也是其旁之人室廬竹也用  
器竹也樵而薪者竹也以貿米鹽而出之其鄰境者竹

也夫此人豈知竹之愛脩然而喜諄諄然語人而以夸之曰吾居有竹也哉文叔亦輒然而笑曰不然夫物安知其貴賤之所常在玉之美而藍田以抵鵲沈為美木而交趾以為槃食羃白鵬錦雉山中以醢腊而貴人以百金致茗以為粥而胡人以為佩夫物固有以多為賤而以少為貴者今夫王城之廣大九塗四達三門十二百坊之基置上自王侯至於百姓庶民宮接而垣比車馬之所騰藉人氣之所蒸漬囂塵百里欲求尺寸之地

以休佚而莫之致而貧者置圃無所況於其他哉然則  
環堵不容丈而有竹如吾堂者不知能幾人也則余所  
以揭之於棟而名之書諸壁而記之翛然而喜諄諄然  
語客而以夸之不亦可哉且竹之美昔人以比德松柏  
在冬夏青青君子之所獨也以夫少猶貴之使余得見  
夫渭川淇園與南山之蒼蔚者而遊其間雖多固不可  
賤也夫多猶不可賤而又況其少哉客曰唯雖然吾聞  
昔王子猷好竹嘗曰安可一日無此君聞吳中士大夫



有佳竹欲觀之徑出坐輿造竹下諷嘯良久主人欲留而不可將出主人閉之因盡歡而返今文叔居有竹文叔姑亦洒埽儲具借不邀客客將造門坐堂上不去曰竹固招我元祐四年五月二十八日潁川晁補之无咎記

清美堂記

昔柳子厚名愚溪而居而溪之神見夢曰余甚清且美為子所喜子幸擇而居余而辱余以無實之名以為愚

耶子厚與之辨其言信激而有理須城王景亮以為不  
然曰夫物之名物之實也且子厚固不愚夫安能使溪  
愚也士而矜其能不自愛以近權利而取悔未始病其  
智也而曰我固愚余羞之在州里則賢不肖小大皆趨  
焉行四方則人慕交之居朝廷則附者衆若此皆自以  
為吾智能得之而余以為有命故余進則不敢以智徼  
其所難而退亦不敢以余力之所無如何而受余之愚  
責汶之陽廬泉之上其南大澤其土腴其生物夥而可

悅築圃而居之為堂以臨廬泉而挹北山取其所謂甚清且美者合而名余堂廬泉之上多楊柳茂木可休而坐釣魚以忘老杖而望北山雲氣之浮游可接也其前岡阜陂隰摧隤而淅漫青齊之往來者岐路迤靡牛羊麥禾膏野極望鳴鶴鶴而下鳬雁也余又種花其旁為錦堤鑿堂之東西為池植柏其塘以達于門為逕為臺為庵為亭以出眺而入息以與賓客坐而談笑為樂叢竹雜果奇石異草凡物之清且美而可悅者甚衆也獨

泉乎哉且物之清惟其自然宜不以人之所處要地僻  
壤改其度也然世之人出入乎官府而往來乎塵市者  
朱墨倉攘之與居米鹽諠啾之與曹雖有物境可以澄  
耳目而曠心意者不暇一接則物雖不以要地僻壤所  
處者改其度而自人觀之異矣而余終歲優游焉於此  
則所謂清美而可悅者非余獨得之哉而所為名余堂  
者亦豈非以其實耶柳子厚以謫居遠方一旦得官捨  
而去孰與余常有此也於是求文潁川晁補之以記之

補之曰嗟乎昔之君子進則急於功名不暇擇當否退而對不逢則誣溪谷草木以自解說豈不過甚矣乎若景亮進不干時退而處其常斯可矣近時豫章黃庭堅魯直有美名其羈旅於魏嘗歌曰盧泉之瀕可忘死補之愛焉然補之亦未嘗至盧泉也獨嘗以事出鄆之東郭見其川源土俗之富意固樂之而補之先君又葬於濟濟與鄆澤南北也庶幾它日過景亮臨斯泉一醉解吾纓而濯之元祐二年十二月二十五日記

白蓮社圖記

廬山白蓮社十八賢者始晉太元中雁門正覺法師慧遠愛此山卜居之而河內覺寂大師慧永先居西林故法師所居號東林云法師神明英越初從太行釋道安落髮道安知其能使道流東國者也時諸方名德聞風而至與同修淨土之社者甚衆而十八賢者社中之傑也曰佛馱耶舍佛馱跋陀羅竺道生慧持慧叡曇恒道暉道敬曇詵內有士曰劉遺民雷次宗周續之宗炳張

野張詮合十八人而佛馱二尊者劉賓人皆神僧也餘各有異跡又法師最善陶淵明陸修靖兩人高蹈不肯入社先是南海漁人嘗網得文殊金像有文云阿育王造也後商人於東海得其圓光以合像若符節陶侃嘗取之旋失去至是法師禱之江上出焉永公室中嘗有虎或畏之即驅上山去恒公行有鹿馴擾耶舍赤髭呪水洗弟子足使閉目但聞風聲自龜茲一夕至姑臧跋陀羅嘗見彌勒兜率天上得不還果有釋迦舍利三顆

及羣士等皆有異跡見於其傳則法師可知已初法師  
送客常以虎溪為限最厚陶潛陸修靖偶送兩客不覺  
過溪然陶忘懷得失晉宋間一人耳修靖後得道度世  
兩人固非入社者皆善法師而謝靈運恃才傲物嘗求  
入社法師以心雜止之靈運不恨也為鑿二池種白蓮  
後名其社云殷仲堪之為荊州也時入山修敬故圖中  
所繪陶陸謝殷在十八人之外今龍眠李公麟為此圖  
筆最勝然恨其畧也故余稍附益之凡社中士十八人



非社中士四從者若干馬六蓋人物因龍眠之舊者十  
五他皆新意也菩薩像倣侯翌雲氣倣吳道元受塔天  
王圖松石以闕仝堂殿雜草樹以周昉郭忠恕卧槎壘  
藤以李成崖壁瘦木以許道寧湍流山嶺騎從韃服以  
魏賢馬以韓幹虎以包鼎猿猴鹿以易元吉鶴白鷗若  
鳥鼠以崔白余自以意先為山石位置向背物皆作粉  
本以授畫史孟仲寧使模寫潤色之余幼慕無生法墮  
世網不得出貶玉溪時道廬山愛而欲居不可家緡城

八年時往來於懷也至為思山辭十數醉輒歌之初見李圖悠然忽如蠟屐扶杖行其中故為此圖特盡意

澶州學生登科記

周公封於魯禮樂傳焉孔子生於魯六經出焉學之為聖人事其求莫近於魯也孔子曰魯衛之政兄弟也魯衛固兄弟而政豈兄弟也耶雖然周公教康叔以求商之遺民賢人君子長者康叔能修之武公文公有文章道化蓋美哉淵乎憂而不困者於詩具在也孔子取之

適衛而言曰庶矣哉如有用我者三年有成聖人之於  
衛亦不可無澤也秦并天下立州郡至於今不改而君  
角之亡地澶卽其墟始余自南州求濟中流而歎知衛  
之美也登南北城而望則山川迤靡圖記可指蓋楚宮  
頓邱泉源淇水須漕之地仿佛而在其詩曰如切如磋  
如琢如磨彼妹者子何以告之則原其國俗好學而樂  
善本於餘習者如此自季札見夫五人者以謂衛多君  
子其國無故則其所從來者舊矣非特孔子時為然也

而秦漢以降士或忘其故習不醇乎文學之緒有夏育  
尚氣任俠之風述往事者不善子羔脫身於孔氏之難  
而喜道仲由結纓於臺下之勇也蓋莫盛於漢質直如  
汲黯曠時而不一人而倜儻喜戰鬪如後魏李崇輩比  
者迄於五代往往而出相望也反而思之然後知治天  
下病學校之不設太祖太宗神武不殺四夷屈降真宗  
北巡叛虜奪氣而澶之人始開門相往來人人知本農  
桑勸學校以不忘其故家遺俗之盛士亦稍稍能自有

聞於時繇學生而取科第者自興國逮元豐可攷而記者若干人其一時行事皆有可道而不幸窮天且世無人者又不可勝訪斯已盛矣今天子以儒術治天下而汲郡韓公之守澶也能推天子所以樂儒術之意行之其邦始命其叅軍晁補之率邦人諸生而與之游且告補之曰無所待而興者豪傑也降是則君子不能無勸焉士而知讀書為儒取科第列士大夫以歸榮其親榮其邦人焉亦可尚矣子無乃為次叙其名氏而記之子

聞而益喜曰不可一日而不治者三晦之宅猶如此目前之事猶如此況人倫所以本乎跨淳梁而望大河之奔渾為馬圖為榮光神氣之發也獨人異哉將必有君子如季札之所道其理然也因歷攷其古之所以盛所以衰與夫風聲氣俗之變而載若干人者於其後使邦人諸生一過而知焉後之大車駟馬洋洋乎四方人指以為勸者亦知夫所以致此自公之教而始也公名璫官右諫議大夫云元豐三年十二月某日記

金鄉張氏重修園亭記

濟為州治鉅野下土草木不殖其西北無山東南五十里乃有山而金鄉其東南邑故緡城地云嘗鑿山得金因為金山縣凡平土淺山無金此山乃有金知其地氣與並澤異凡九穀果蓏土有宜有不宜此咸宜若松檜梅櫟遷乎其地而不能為良者植此皆良又不可知也  
以余為兒時所聞見其俗饒美大家率輕作業樂善而好士厚子弟於學游客晨夜相面背于門庖無熄煙然

不勸又好為園圃游樂事以相尚而非為利張氏其甲也其先世豐人太宗時侍御史肅字穆之以敢言不苟合四十謝事為王黃州所畏始起家而顯者也御史子畋字無逸高介有父風亦早棄事初壞田作此園佳木異卉錯置竹萬竿出郭門而望翦然秀色橫野其陽金梭嶺陰賀溝起伏異狀其外莽蒼無際目極可喜無逸得此因忘仕宦意而故張公安道石公曼卿皆與往來良厚園有亭曰先春張公客游愛之石公為宰每醉而



忘返也皆有詩留亭上兩公前輩偉人傑士不妄以詩  
與人也蓋六七十年矣前此無逸子孝綽孝基孝孫亦  
善士好客能修其先人之業猶及與余先大夫游聞先  
大夫稱焉不知園幾時廢而元符中余南歸始自鉅野  
遷此邑並嶺行溝上秋稼離離雉驚起馬前館無遺址  
桃李不復在獨兩老檜離立穀壠間風雨摧剥蒼皮白  
枝龍虎躩擎而上數十尺道行隰而來未見也下馬半  
嶺北望南武七星諸山或斷或續屏列遠陸如畫其南

數百鳬雁飛集鳴唼聲回望白水明滅桑野間意甚樂  
之順塗而詠吾居不可以易此也因買田築室距百步  
時時至其地捫檜坐石至於日入悵然惜兩公之跡將  
泯而恨無逸之不復見也而其孫大方從余游久乃語  
之大方則啾然有間曰此固張氏地請復焉未數歲則  
築垣移植如其故徑檻旁午草木扶疎矣且營三亭曰  
先春其舊名也曰樂意曰生香因曼卿之詩也又礪三  
石來言曰其一求文以記其事其二請書兩公詩與記

俱傳也余欣然曰吾里俗哀不有君子何以使復善且  
為近市利日不足鋤犂腹飽則載粟入城市賈士宅士  
無邑居故吾里之為士者微今子獨能羞而反之不致  
求贏餘既異俚俗意而憂世家之墜念祖父之所嘗游  
賢公才士之跡至此而俱熄也慨然圖復之又欲因文  
以傳尤異余何愛不為子記之亦稍稍化吾里持家猶  
子豈但數過子相羊樂飲無人之境以忘吾老如是而  
已也大觀二年七月十八日潁川晁補之記

近智齋記

傳曰計人之所知不若其所不知宇宙至廣萬物至夥  
千古至遠衆理至幽而欲以七尺之軀方寸之地盡攬  
而悉儲之譬以芥納山人知其不可故神智大矣德配  
著卦而昔人猶或以謂智有所困神有所不通雖然聖  
人蓋常通而不困夫常通而不困豈特其生而知之皆  
備於我者能若是亦必曰好古敏以求之也而天下之  
不知者廼始曰聖人必其生而知之故不窮其曰好古

敏以求之者孔子之所以自貶聖而不居之意也是不  
然祖述堯舜憲章文武律天時襲水土刪詩定書雅言  
執禮至於常編三絕曰我於易則彬彬矣是固孔子所  
以學也豈曰我生而知之學皆可已哉雖然自其常通  
而不困語之神不可知而智則學者可以俱至舜稱智  
臧武仲亦稱智而臧武仲去舜遠雖才異亦學不造其  
極也學造其極則無不知故智之為言惟好學為能近  
平居無事反觀而內融上思千載若存若亡中攬四海

若隱若顯下索將來若絕若續譬空中雨欲數其滴有  
不勝知者矣欲知之奈何惟學而已矣學則聖人之智  
亦無窮用無窮遂無窮亦窮則凡理之不可勝知者有  
不能外吾之所察易曰通乎晝夜之道而知此古人所  
以事至而辨物來而名也可謂不智乎事物之過吾前  
如日月更代而無止而吾知所以應之如井泉愈汲而  
愈不竭蓋學之効如此不可謂不智也頃余術不與時  
偶廢官休其廛八年而巷之草沒屐或嘖之輒自語曰

足固未嘗則而士相與戒而遠之曰是其術也不利人  
昵且招悔而袁君耕道獨往來從余者亦八年其意不  
衰或謝不見或乍見而不留卒不懟或旦暮見或易與  
言如家人卒不侮余歎曰甚矣耕道可謂好學也抑人  
所戒遠利近悔奈何耕道猶笑自如而余記誦益落文  
字益疎顧無以應耕道求又不敢以其不知而作者語  
之雖語之而知也無涯使耕道何自入故第誦中庸語  
曰好學近乎智以勉之好學云者非孔子顏淵不得以

私相與然各從其志獨顏淵得好學而已哉時習之為  
說譬冰水為之而寒於水苟不已則所不知當益知故  
求智者莫近反而言之則好官爵好貨財至塞其心如  
蹊間之茅者皆愚矣人之所以無知若草木自愚其心  
者耕道可不反戒而遠之惟恐其似若彼之相與戒而  
遠我哉因為之名其所居齋曰近智耕道勉之乃棟牖  
花竹起居之佚視聽之適則不足道也大觀四年七月

十四日記



雞肋集卷三十

欽定四庫全書

雞肋集卷三十一目錄

記

新城遊北山記

睡鄉閣記

潛齋記

歸來子名緡城所居記

積善堂記

永感堂記

宋故尚書刑部郎中知越州軍州事贈特進吏

部尚書南安晁公改葬記

中大夫提舉南京鴻慶宮李公生祠記

雞肋集卷三十一目錄

欽定四庫全書

雞肋集卷三十一

宋 晁補之 撰

記

新城遊北山記

去新城之北三十里山漸深草木泉石漸幽初猶騎  
行石齒間旁皆大松曲者如蓋直者如幢立者如人  
卧者如蚪松下草間有泉沮洳伏見墮石井鏘然而  
鳴松間藤數十尺蜿蜒如大蛇其上有鳥黑如鴈鵠

赤冠長喙俛而啄磔然有聲稍西一峯高絕有蹊介然僅可步繫馬石背相扶攜而上篁篠仰不見日如四五里乃聞雞聲有僧布袍躡履來迎與之語愕而顧如麋鹿不可接頂有屋數十間曲折依崖壁為欄楯如蝸鼠繚繞乃得出門牖相值既坐山風颯然而至堂殿鈴鐸皆鳴二三子相顧而驚不知身之在何境也且暮皆宿於時九月天高露清山空月明仰視星斗皆光大如適在人上窗間竹數十竿相摩戛聲

切切不已竹間海棕森然如鬼魅離立突鬚之狀二  
三子又相顧竄動而不得寐遲明皆去既還家數日  
猶恍惚若有遇因追記之後不復到然往往想見其  
事也

睡鄉閣記

睡鄉之境蓋與齊州接而齊州之民無知者其政甚淳  
其俗甚均其土平夷廣大無東西南北其人安恬舒適  
無疾痛札厲昏然不生七情茫然不交萬事蕩然不知

天地日月不絲不縠佚臥而自足不舟不車極意而遠  
游冬而絺夏而纊不知其反寒暑得而悲失而喜不知  
其反利害以謂凡其所自見者皆妄也昔黃帝聞而樂  
之閒居齊心服形三月弗獲其治疲而睡蓋至鄉既寢  
厭其國之多事也召二臣而告之凡二十有八年而天  
下大治如睡鄉焉降及堯舜無為世以為睡鄉之俗也  
禹湯股無胈脛無毛剪爪為牲以救天災不暇與睡鄉  
往來武王始克商還周自夜不寢曰吾未定大業周公

夜以繼日坐以待旦為王作禮樂伐鼓叩鐘雞人號于  
右則睡鄉之邊徼屢警矣其孫穆王慕黃帝之事因西  
方化人而神游焉騰虛空棄雲霧卒莫覩所謂睡鄉也  
至孔子時有宰予者亦奇其學而游焉不得其塗大迷  
繆而返戰國秦漢之君悲秋傷生內窮於長夜之飲外  
累於攻戰之具於是睡鄉始邱墟矣而蒙漆園吏莊周  
者知過之化為蝴蝶翩翩其間蒙人弗覺也其後山人  
處士之慕道者猶往往而至至則囂然樂而亡歸或以



為之徒云嗟夫余也幼而行勤長而競時卒不能革豈  
不迂哉將因斯人之問津也故記之

潛齋記

潛室之廣無丈其高如之背陽而面陰遠溫而趨寒高  
室雙翼外蔭老木翳其前小竹叢其右朦朧曖曖光景  
不曜蓋若蟄蟲伏獸之所潛焉而潛之名所為得也客  
過予者曰方今主聖臣良政恬俗康朝有鵷鸞野無豺  
狼可謂有道之世矣吾子生二十長六尺出不能提桴

鼓以動百萬之師左烏號之弓右昆吾之劍喑鳴咤叱  
北收祁連西虜靈夏入不能陪黃閣之末議聯紫微之  
別班正容端色以齊肅百吏操紙握管以號令四海今  
反幽幽默默逃形遠跡以頑處心以潛名室豈非所謂  
倒行而逆施者邪予瞿然而驚舍然而笑曰有是哉主  
聖臣良此吾潛之所為甘乎分者也政恬俗康此吾潛  
之所為幸乎安也朝有鵷鸞野無豺狼此吾潛之所為  
有殆乎享也而反以是而疑我頑其亦未之思耶請為

客言潛易曰雷在地中復此天地之潛也而陽氣已動  
乎黃泉矣尺蠖之屈以求伸也龍蛇之蟄以存身也此  
蟲獸之潛也而小者獲信大者獲存矣故不能靜者不  
能動不能處者不能出然則奚行之倒而施之逆耶昔  
者回憲潛於道故闇然而日彰黃綺潛於聲故默然而  
浸揚潛乎潛將以為不潛者矣客俛而出因記其語於  
壁

歸來子名緡城所居記

少日讀書不陞孔子之堂自夔咎繇而下若巫咸傳說則器不逮遭時有用庶幾學鄭子產晉叔向之為人尚恐其遠且一國佐不足用天下事君慕汲黯劉向而媿二子之直且博顧嘗好孫吳頗通其說用以為策悟非已志輒去之獨於文詞喜左邱明檀弓莊周屈原司馬遷相如枚乘若唐韓柳氏古樂府詩人之作時時發於事又拙不工晚得釋氏外生死說始盡屏舊習皇皇如堂室四達無所依方寸之地虛矣又不喜晉人初不知

道徒窺其藩謂盡至清言誤世念身於古無一可數讀  
陶潛歸去來詞覺已不似而願師之買田故緡城自謂  
歸來子廬舍登覽游息之地一戶一牖皆欲致歸去來  
之意故頗撫陶詞以名之為堂面園之草木曰松菊松  
菊猶存也為軒達其屏使虛以來風曰舒嘯登東皋以  
舒嘯也為亭廣其趾使庳以瞰池曰臨賦臨清流而賦  
詩也封土為臺架屋其顛若樓瞰百里曰遐觀穿室其  
腹若洞深五步曰流憩策扶老以流憩時矯首而遐觀

也為庵抱陽而圓之以嬉晝倚南窗以寄傲也曰寄傲  
為庵負陰而方之以休夜鳥倦飛而知還也曰倦飛顧  
所居遠山水非柴桑比門直通道有長坂亘其前數十  
里故渠縈之蒲柳蓊然魚鳥之所聚有邱壑意俯而就  
其深為亭曰窈窕既窈窕以尋壑也跂而即其高為亭  
曰崎嶇亦崎嶇而經邱也凡因其詞以名者九既勝而  
書之日往來其間則若淵明卧起與俱仰勝而味其詞  
則如與淵明晤語接躊躇自得無往而不歸來矣猶相

觀左右意不自足懼失淵明一語也因喟然太息自幼壯至于白首勤苦蘄盡探聖賢之蘊上則欲觀性而復其初次猶欲慕古人著之行事晚無一諧乃徒恐迷而忘歸又欲盡屏所習使空無有至為一淵明懼不足何哉學道者惡夸夸則不近且人才力有分以盡為人之所為而求有功則常不足以盡不為人之所為而要無事則常有餘夫知其無可奈何而安之若命若淵明其幾矣又陶之自叙云環堵蕭然不蔽風日短褐穿結簞

瓢屢空晏如也忘懷得失以此自終淵明誠於此有餘  
裕今余居不至環堵衣不至穿結食不至屢空以若所  
養為淵明固易而余遭盛時嘗見識拔汙臺省國恩未  
報而決然去之以若所歎為淵明固難一以為淵明易  
則是余與淵明倨欲以此自終而子難易棄除一以為  
淵明難則余於淵明得失亦未有辯也或曰淵明亦晉  
人抑知道者非耶而顧自以為其葛天氏之民與奈何  
曰嘗讀釋氏說譬如動目能搖湛水今余與子常動不



足以觀湛彼淵明湛者類也嘗試與子去夫膠膠擾擾之蹊而處陰以休影若是者有年喉喘寧而顛汗止而后相與求淵明於葛天氏之國泯然見其塗巷乃余與子昔所嘗歷而去之久者乃今來歸而后淵明可侶其知道與否可得而議也

積善堂記

積善之家必有餘慶孔子贊易之言也而晁氏得以名其堂何耶惟宋八世道隆而治洽皇帝以聖孝既右烈

考亦以教民孝詔歲丁亥為大觀元年因大赦天下民  
百歲男子官婦人封仕而父母年九十官封如民百歲  
於是故漳州軍事判官晁公諱仲康之母夫人黃氏年  
九十一矣其第四子仲詢與其兄仲謀喜而議以仲詢  
走京師狀其事省中為漳州請漳州雖沒赦令初不異  
往者於是丞相以為可而上之制曰黃氏蘊仁積善享  
有耄齡可壽光縣太君其子榮君之錫而慶其親之享  
斯榮也以少牢告禰廟且告漳州又告其祖如禰廟禮

又周示其族人鄉黨作堂以奉夫人而名之曰積善退  
飲酒相賀為歌詩以敷訓詞以昭夫人之淑慎以慰其  
心而介期頤謂補之曰吾君盛德在書所謂欽時五福  
用敷錫厥庶民者其賚及我家爾頃為春官屬列太史  
氏此國之昭典盛事家之餘慶爾職書之補之曰諾禮  
祝則名君為神厭也父前子名君前臣名為尊厭也自  
夫人言之皆子而下若載事法皆名昔晉欒書實鍼之  
父鍼為右書以將越載君鍼曰書退鍼名父不悖禮猶

在益恭之列非車上僊之類請以諭不知者而後書惟  
鼂氏自漢大夫以忠探七國之旤本而撥之以安劉氏  
劉氏無遺旤享國四百年而大夫不終漢祿以身膏東  
帑奉祀無聞焉又千有一百餘年而文元公起家仁義  
忠信樂善不勸蓋具於天爵實兄弟三人伯刑部侍郎  
補之高祖也叔吏部尚書夫人舅也皆中和孝弟慈惠  
而愛人用鍾其慶六世子孫男女嬪婦至口五百而夫  
人為子婦今存屬最尊又獨享是壽祿康寧悅豫鼂氏

之積善皆歸焉抑晁氏自文莊公秉政勲業在王室逮  
今六十餘年而仕益微似不可振而夫人之仁善於是  
獨報將其子誠孝幹母之蠱神實祐之亦夫人少難約  
晚廼儲此如訓詞旨蓋六世口五百未有及者雖來者  
未可知抑鮮矣豈造物者報其人雖如易語積善必有  
餘慶而享斯報者亦必如夫人淑慎身所自履有以致  
之耶然晁氏為善者亦多矣或不享又何也不然吾宗  
之餘慶久躋且復起將自夫人啟之夫人既屬尊歲時

集會子孫族人螽斯雁行官學者冠者提者抱者少長咸在而補之廼於夫人為族曾孫年五十五矣獨素髮垂領搢笏跪起以壽夫人於羣從之後蓋世之老人見曾孫尚多有之如夫人見曾孫數十其長者已白首又自有孫在昔良少於是具載本末以為世積善者之勸云

永感堂記

東平董耘武子年少以孝聞既葬其親天堂山之下而

築堂其北以享以居而榜之曰永感書來求文曰非以  
記室宇之陋也以極耘不孝之思也某泣然曰某少孤  
不天中年太夫人棄養愛生不能死以皇皇就食于四  
方遠者十年近者四三年廼一歸手拔墓上草則泚吾  
顙我尚忍記吾武子斯堂也哉天下莫悲於言言莫悲  
于音若曰孤子之鈎以為隱九寡之珥以為的則音無  
此最悲也夫隱鈎珥奚取於為音緣名而益悲則武子  
之名斯堂其意悲矣天下豈有無親之子哉捨所厚而

從其薄或宦學遠鄉里無朝夕養死且不葬聞斯堂之名則怛然內熱如吾泚者多矣而武子不泚是乃武子之所為以孝聞者也閔子騫人不間於其父母昆弟之言孔子曰孝哉閔子騫宰我曰鑽燧改火期可已矣孔子曰子之不仁也充武子之志則雖未敢曰方孝於子騫而尚足以愧不仁之宰子豈但泚夫如吾泚者而已哉是乃武子之所為以孝聞者也人亦有言忠孝不兩立王尊叱其馭於九折坂曰王陽為孝子王尊為忠臣



士亦以是藉其口損其親從利而不顧然有王尊之志則可不然食人之食以老無補而覩其面於人間託移孝以自恕驚歧道而亡羊聞斯人之風其亦庶幾乎有慙而復也哉年月日鉅野晁補之无咎記

宋尚書刑部郎中知越州軍州事贈特進吏部尚書南安晁公改葬記

贈特進吏部尚書晁公以慶歷四年九月己酉既葬於祥符大墓矣後六十六年實大觀四年三月壬寅改定

于任城魚山先是祥符地卑多水患自特進公五子伯  
庫部公而下雜然以為慮而叔虞部公尤患之議遷不  
果至是特進公子皆前沒而虞部公之子泰寧軍節度  
推官前知莘縣事端禮朝散郎前通判徐州事端智相  
與議必成其先志以告羣從諸孫及庫部公之孫補之  
等曰祥符水患諸子之責猶諸孫之責也且特進公之  
子庫部公而下皆葬魚山遷魚山宜抑族墳墓以安神  
則從以烝嘗合食則類又宜衆曰唯於時諸孫存者莘

縣為長萃縣廼走京師告特進公墓并舉河間縣太君  
劉氏之柩護奉以歸啟空易擲改祔惟美凡資用皆萃  
縣力也初補之居蓬萊縣太君喪始學地理行視魚山  
崦中若虎若牛回抱踞盼勢盤薄可喜乃厚其賈取之  
手植四松定南北既命師袁才筮地袁徙其域稍東纔  
五尺而止前十丙室遷庫部公與夫人之柩至是以特  
進公劉夫人宅丙室而將以壬申二室遷庫部公與補  
之考朝議公以從特進公兆焉既即事又屬補之記本

未而特進公氏諱爵里行事之實已載端明殿學士李  
淑所撰誌銘中不復書獨記改卜及所告祭文并納壙  
中若庫部公諸弟子孫婚宦則各具於銘誌皆不復出  
云曾孫朝散大夫管句南京鴻慶宮飛騎尉賜緋魚袋  
補之謹記

中大夫提舉南京鴻慶宮李公生祠記


中大夫提舉南京鴻慶宮隴西郡開國李侯棻少以文  
詞及進士第所居官官治卓然有聲於搢紳間公卿大

臣若當塗之顯人言其才可用者以百數而侯於莅官  
務盡其心力蓋慕昔人奉法循理不肯少如玉多如石  
者故人不得而置親踈世亦不得盡其材而侯亦超然  
自得於二累之上守其操不改外若不足而中無愧焉  
者也尤長於治郡有遺愛於同華商邠四州而蒲又侯  
之里也故士以其老成為矜式民懷其舊以謂知吾俗  
而不迂吾安其治而不忘者莫如侯乃相與謀其子弟  
若邦人之樂善好誼者為侯立生祠會補之自尚書郎

出守蒲下車拜侯於里中問民所疾苦求施設之方且  
誦秦穆公求黃髮則無過之言以為請而侯亦欣然傾  
蓋偃語與之忘年又因以教邦人諸生悌長而貴老此  
守之事補之之志也或曰以侯之才雖官視九卿年耄  
耄以康寧而食飲猶為不過補之曰士有志遇不遇有  
命若常情言者仕而不至將相皆不遇也以義則一官  
而可以行志皆遇也龔遂黃霸郡守也而尊魯恭卓茂  
縣令也而貴其同時公相位四人上者豈皆傳然則貴

且尊果不在爵遇不遇惟其所施屈吾指以數往行而  
吾無愧焉者則吾之遇不既有餘矣乎嘗試過侯之居  
陞高以望其前則太華削成四方矗然倚立而參天右  
則黃河出於龍門洶乎蹈颺而鳴地南則首陽危顛不  
毛伯夷叔齊之所登也東則王官深谷絕跡司空圖之  
所藏也因顧侯而語想見古昔之盛夸奪相雄間不容  
息與二三君子之遁逃一世寂寥長往雖勢相什伯皆  
忽然而過如吹劍一映何有得失而侯乃以少壯陳力

有政四州老乃休此固異於斯人者兒童流輩如風中  
燭而侯獨白首笑傲康寧食飲如平時有何不足而慕  
夫世之役役生趨榮而沒有恨者以為愧哉因舉酒而  
起為侯壽曰樂哉非不遇也崇寧元年九月旦日記





雞肋集卷三十一